

Jura autem Episcopalia in locis istis decimalibus ipsum retinuisse, successorum ejus gesta in clara luce collocant. Decimas Fuldense Monasterium habuisse Cl. Schannatus probat duobus monumentis, quæ inter Probationes operis ejus n. VI. et VIII. extant. Primum est *Charta Hattonis I. Abbatis Fuldensis, qua de bonis quibusdam ac decimis Ecclesie sue attinentibus in favorem pauperum disponit.* In ea Hatto inquit: *cernens paucitatem prædiorum et decimationum, quæ ad Portam Monasterii Fuldensis - - - pertinebant, ad sustentandos et refrigerandos hospites et pauperes Christi - - - non posse sufficere; Papam Leonem adiit, et Lotharium Imperatorem, et cum auctoritate eorum et permissione, ista prædia, quæ subscripta sunt, ad recreandos hospites concessi, quam concessionem Papa Leo, banno suo, et Lotharius Imperator præcepto suo confirmarunt, ut si quis de ipsis bonis sibi aliquid usurparit præter procuratores hospitum, anathema sit, et reus regie Majestatis; Recensentur deinde prædia et una decimatio in villa Echicila, postea vero additur: Factæ sunt autem istæ Traditiones et confirmationes anno Dominicæ Incarnationis DCCCLII. Indiæ. XV. Regnante Lothario Imperatore etc.* Vox *Bannus* pro excommunicatione hoc ævo rarissime occurrit, nec in rebus minoris momenti, qualis hæc prædiorum donatio erat, adhibebatur; et ridiculum est, *reum Majestatis regie* declaratum, qui de ipsis aliquid usurpaverit. Cur autem *Leonem Papam* et *Lotharium Imperatorem* adiit Hatto, ab iisque veniam, donationem hanc faciendi, petiit, qui, si monachi sui consentirent, hoc per se exequi poterat? Cur *Lotharium Imperatorem* adiit, qui post Pactum Viridunense et divisionem regnorum, quam anno 843. cum fratribus Ludovico et Carolo Regibus iniit, nihil quidem juris aut potestatis in Germania habuit, ut vel pueri norunt? *Ludovicus Rex Germaniæ* adeundus fuisset. Hic solus et unicus Fuldensis territorii dominus erat, nec parem aut majorem in regno suo ferebat. Noverit enim Cl. Schannatus, eundem ideo *Rabanum Abbatem* anno 842. Monasterio expulisse, et ejus loco *Hattonem Abbatem* constitutum fuisse, quod *Rabanus Lothario Imperatori* favisset. Jam ipse, qua est perspicacia, clare videbit, *Chartam hanc Hattonis* supposititiam et confictam esse.

Hattonis I. Abbatis Charta de decimis sustentationi pauperum destinatis supposititia.

Banni vox pro excommunicatione seculo IX. rarissima.

Lotharius Imp. Fuldæ dominus non fuit, nec regnum Germaniæ habuit.

XV. Alterum monumentum, quo Decimas Fuldense Monasterium in Thuringia habuisse Cl. Schannatus probat, est *Diploma Ludovici Regis Germaniæ*, quo decimæ fidelium per Thuringiam, aliasque plures provincias adversus *Liuperdum* [Liutbertum] *Mogontinæ Sedis Primatem* Sigehardo Abbati Fuldensi adjudicantur. Ex autographo illud se edidisse profitetur. Incipit: *In Nomine Dei et Salvatoris nostri Jesu Christi.* Hac vero formula non *Ludovicus Germanicus*, sed *Ludovicus Pius*, pater ejus, usus est. *Ludovicus Germanicus* formulam *In nomine sanctæ et individue Trinitatis* constanter adhibuit. Titulus *Ludovici* hic est: *Ludovicus propiciante clementia Dei Rex*, quem tamen hic nunquam sibi tribuit, sed semper se *Hludovicum divina favente gratia vel clementia Regem* nominavit. Ingens Diplomatum numerus, quem partim ipse in autographis vidi, hoc demonstrat, nec quisquam hac in re mihi non fidet, cum et *Mabillonius* jam idem observarit. In Diplomate ipso Decimæ Fuldensis Ecclesiæ longo ordine recensentur in pagis *Thuringia, Wormaciensi, Rhenensi, Wetereiba, Hassia, Monihgovve, Loganaha, Salegovve et Graphelt* sitæ, et confirmantur. Diocesin Archiepiscopi *Moguntini* usque in pagos *Salegovve et Graphelt* extensam non fuisse, certum est. Unde omnes Decimas Fuldensis Ecclesiæ hic confirmari, etiam in aliis Diocesibus jacentes, conjicias; simul

Diploma Ludovici Germanici supposititium.